



НИЙСЛЭЛИЙН БАГАХАНГАЙ ДҮҮРГИЙН ИРГЭДИЙН
ТӨЛӨӨЛӨГЧДИЙН ХУРЛЫН ТОГТООЛ

2013 оны 12 сарын 18 өдөр

Дугаар А/25

Улаанбаатар хот

ЖУРАМ БАТЛАХ ТУХАЙ

Монгол Улсын Засаг захиргаа нутаг дэвсгэрийн нэгж, түүний удирдлагын тухай хуулийн 25 дугаар зүйлийн 25.1, Боловсролын тухай хуулийн 43 дугаар зүйлийн 43.1.1 дэх заалтыг үндэслэн Багахангай дүүргийн Иргэдийн Төлөөлөгчдийн Хурлын ээлжит VI дугаар хуралдаанаас ТОГТООХ НЬ:

Нэг. Дүүргийн нутаг дэвсгэрт хэрэгжүүлэх “Онцгой амжилт гаргасан багш, сурагчдыг шагнаж урамшуулах журам”-ыг хавсралтаар баталсугай.

Хоёр. Онцгой амжилт гаргасан боловсролын байгууллагын багш, сурган хүмүүжүүлэгч, хамт олон, сурлага, урлаг, спортын өндөр амжилт үзүүлсэн сурагчдийг шагнаж урамшуулахдаа энэхүү журмыг баримталж ажиллахыг Нийгмийн хөгжлийн хэлтэс /Ш.Баасансүрэн/, Боловсролын хэлтэс /Ц.Дэнсмаа/- нарт үүрэг болгосугай.

Гурав. Энэхүү тогтоолыг 2014 оны 01-р сарын 01-ний өдрөөс эхлэн мөрдөж ажиллахыг боловсролын байгууллагын захирал, эрхлэгч нарт, журмын хэрэгжилтэнд хяналт тавьж ажиллахыг дүүргийн Иргэдийн Төлөөлөгчдийн Хурлын Тэргүүлэгчдэд даалгасугай.

ДАРГА



И.БАТНАСАН

Нийслэлийн Багахангай дүүргийн Иргэдийн
Төлөөлөгчдийн Хурлын 2013 оны 12 сарын
12 өдрийн хурлын 42 тоот тогтоолын хавсралт

Онцгой амжилт гаргасан багш, сурагчдыг шагнаж урамшуулах журам

Нэг. Нийтлэг үндэслэл

1.1 Боловсролын талаар төрөөс баримтлах бодлого, шийдвэр, Монгол Улсын Засгийн газар, нийслэл, дүүргийн Засаг даргын мөрийн хөтөлбөрийг хэрэгжүүлэх, өсвөр залуу үеийг сурган хүмүүжүүлэх үйл хэрэгт идэвх зүтгэл гарган, үр бүтээлтэй ажиллаж, онцгой амжилт гаргасан боловсролын байгууллагын багш, сурган хүмүүжүүлэгч, хамт олон, сурлага, урлаг, спортын өндөр амжилт үзүүлсэн сурагчийг шагнаж урамшуулахад энэхүү журмыг мөрдөнө.

Хоёр. Шагналын хамрах хүрээ

2.1 Олон улс, улс, нийслэлийн олимпиад, уралдаанд тэмцээнд өөрөө буюу бэлтгэсэн шавь нар нь оролцож эхний 1-3 дугаар байр эзэлсэн **багш сурган хүмүүжүүлэгч**

2.2 Олон улс, улс, нийслэлийн олимпиад, уралдаан тэмцээнд оролцож эхний 1-3 дугаар байрт шалгарсан **сурагч**

2.3 Олон улс, улс, нийслэлийн олимпиад, уралдаанд тэмцээнд оролцож эхний 1-3 дугаар байр эзэлсэн **баг, хамт олон**

Гурав. Шагналд тодорхойлох, бүрдүүлэх материал

3.1 Шагналд нэр дэвшигч нь журмын шалгуурыг хангасан байна.

3.2 Шагнуулахаар нэр дэвшүүлсэн хүмүүсийг тодорхойлохдоо дор дурдсан материалыг бүрдүүлэн үндсэн байгууллагын албан тоотоор баталгаажуулж ирүүлнэ. Үүнд:

а/ Ажил байдлын тодорхойлолт

б/ Шагналын батламжийн хуулбар

3.4 Шагнагдагсдын ажил байдлын тодорхойлолтод ажлын амжилт, туршлага, авьяас чадвар, оруулсан хувь нэмрийг үнэн зөв тодорхой бичиж үндсэн байгууллагын захирал, эрхлэгч нар гарын үсэг зурж баталгаажуулна.

3.5 Шагналын материалыг дүүргийн Боловсролын хэлтэс хянан үзэж ИТХ, Засаг даргын зөвлөлийн хамтарсан хурлаар хэлэлцүүлж шийдвэрлүүлэхээр уламжилна.

Дөрөв. Шагналын сан

4.1 Энэхүү шагналын дагалдах мөнгөн шагналыг орон нутгийн төсвөөс олгоно.

Тав. Шагнал

5.1 Олон Улс, улс, нийслэлийн хэмжээнд зохион байгуулсан олимпиад, уралдаан тэмцээнд 1-3 дугаар байр эзэлж амжилт гаргасан багш, сурагчдад дүүргийн ИТХ, Засаг

даргын хамтарсан Өргөмжлөл хүртээх бөгөөд дагалдах мөнгөн шагналыг дараах байдлаар олгоно.

Мөнгөн шагналын хэмжээ, төг

Хүснэгт: 1

№	Шагналын номинаци	Байр	Олон Улс	Монгол улс	Нийслэл	
1.	Багш	Бие дааж оролцсон	I	1000000	800000	600000
			II	800000	600000	400000
			III	600000	400000	200000
	Сурагч бэлтгэсэн	I	800000	600000	400000	
		II	600000	400000	200000	
		III	300000	200000	100000	
2.	Сурагч	Ганцаарчилсан	I	300000	200000	100000
			II	200000	100000	80000
			III	100000	80000	50000
	Баг хамт олноор	I	400000	250000	150000	
		II	250000	150000	100000	
		III	150000	100000	80000	

5.2. Багш, сурагчдад олгосон мөнгөн шагналын 10 хувийг хүн амын орлогын албан татварт суутгаж тооцно.

Зургаа. Тайлбар:

6.1 **Олон улсын хэмжээнд гэдэгт:** Монгол улсын Засгийн газрын холбогдох тогтоол, журмын дагуу Дэлхий, тив, бүс нутгийн орнуудыг хамарсан олимпиад, уралдаан тэмцээн

6.2 **Монгол улсын хэмжээнд гэдэгт:** Төрийн захиргааны төв байгууллагын шийдвэр, удирдамж, заавар журмаар зохион байгуулагдаж байгаа төрөлжсөн олимпиад, урлаг, спортын уралдаан тэмцээн

6.3 **Нийслэлийн хэмжээнд гэдэгт:** Нийслэлийн төрийн захиргааны байгууллагын шийдвэр, удирдамж, заавар журмын дагуу зохион байгуулагдсан төрөлжсөн олимпиад, урлаг, спортын уралдаан, тэмцээн гэж тус тус ойлгоно.